

Gryphius, Andreas: An eine Hönische vnnd mehr als kluge Person (1640)

- 1 Ihr glaubets warlich nicht/ wie schön es sey zusehen/
- 2 Wenn Ihr den krummen Halß noch dreymal krümmer macht/
- 3 Vnnd durch den weiten Mund so wunder liblich lacht/
- 4 Mit dem Ihr jedes Mensch wisst hönisch zuverschmehen/
- 5 Der weiß vor Hoffart nicht/ wie Ihm doch sey geschehen/
- 6 Vnd zeucht zu närrisch auff/ mit seiner newen Tracht/
- 7 So hat Euch jener nicht des Grusses wehrt geacht/
- 8 Dem must Ihr seine Sprach vnd alle Wort verjähnen/
- 9 Dem mangelts an der Stirn/ vnd jener siht nicht recht/
- 10 Der dort ist gar zu schön/ der hier ist gar zu schlecht/
- 11 Weil aber Ihr so klug seid/ Mängel anzuschawen/
- 12 So fast den Spiegel doch in Ewre schwartze Hand/
- 13 Ich weiß/ eh denn Ihr Euch solt haben drin erkandt/
- 14 Werd Ihr mehr Mängel sehn/ denn Ihr wol jtzdt dörfft trawen.

(Textopus: An eine Hönische vnnd mehr als kluge Person. Abgerufen am 23.01.2026 von <https://www.textopus.de/poe>)